

202X Rhif (Cy.)

IECHYD Y CYHOEDD, CYMRU

Rheoliadau Pwyllgorau Trwyddedu Triniaethau Arbennig (Cymru) 202X

NODYN ESBONIADOL

(Nid yw'r nodyn hwn yn rhan o'r Rheoliadau)

Daw'r Rheoliadau hyn i rym ar XXX ac maent yn gwneud darpariaeth ynghylch y gweithdrefnau sy'n gymwys i bwyllgorau trwyddedu ac is-bwyllgorau trwyddedu ("pwyllgorau perthnasol") pan fo'n ofynnol iddynt gynnal gwrandawriad mewn cysylltiad â thrwyddedu triniaethau arbennig o dan Ran 4 o Ddeddf Iechyd y Cyhoedd (Cymru) 2017 ("y Ddeddf").

O dan Ran 4 o'r Ddeddf, caiff unigolion wneud cais i awdurdod lleol am drwydded triniaeth arbennig a chânt hefyd wneud cais i amrywio neu adnewyddu eu trwydded triniaeth arbennig. Mae adran 61(1) o'r Ddeddf yn caniatáu i awdurdod lleol ddynodi unigolyn yn berson y mae'n ofynnol iddo gael trwydded triniaeth arbennig os yw'n bwriadu rhoi triniaeth arbennig benodedig. Mae adran 68 o'r Ddeddf yn caniatáu i awdurdod lleol ddirymu trwydded triniaeth arbennig o dan amgylchiadau penodedig. Mae adran 73 o'r Ddeddf yn caniatáu i awdurdod lleol ddirymu tystysgrif gymeradwyo o dan amgylchiadau penodedig.

O dan Ran 4 o'r Ddeddf, mae gan awdurdod lleol y pŵer i ddyroddi hysbysiad rhybuddio pan fo'n bwriadu:

- gwrthod cais am drwydded triniaeth arbennig;
- gwrthod cais i amrywio trwydded triniaeth arbennig;
- gwrthod cais i adnewyddu trwydded triniaeth arbennig;
- dynodi unigolyn yn berson y mae'n ofynnol iddo gael trwydded triniaeth arbennig;

- dirymu trwydded triniaeth arbennig;
- dirymu tystysgrif gymeradwyo.

Mae'n ofynnol i awdurdod lleol ystyried sylwadau a gyflwynir wedi iddo ddyroddi hysbysiad rhybuddio mewn perthynas â'r ceisiadau, y dynodiadau arfaethedig a'r dirymiadau arfaethedig hynny.

Mae paragraff 21 o Atodlen 3 i Ddeddf 2017 yn dirprwyo swyddogaethau penodedig awdurdod lleol, sy'n cynnwys ystyried sylwadau o'r fath, i bwyllgor trwyddedu'r awdurdod a sefydlwyd o dan adran 6 o Ddeddf Trwyddedu 2003 ("Deddf 2003").

Mae paragraff 21(2) o Atodlen 3 i Ddeddf 2017 yn cymhwyso adran 7(9) (atgyfeirio'n ôl i awdurdod) ac adran 10 (isdirprwyo) o Ddeddf 2003 mewn perthynas â'r swyddogaethau a ddirprwyir i bwyllgor trwyddedu. Yn rhinwedd adran 7(9) o Ddeddf 2003, os na all pwyllgor trwyddedu gyflawni unrhyw swyddogaeth a ddirprwyir iddo oherwydd nifer yr aelodau ohono na allant gymryd rhan mewn ystyried neu drafod unrhyw fater, rhaid i'r pwyllgor trwyddedu atgyfeirio'r mater yn ôl i'r awdurdod lleol i gyflawni'r swyddogaeth honno. Mae adran 10(1) o Ddeddf 2003 yn caniatáu i bwyllgor trwyddedu ddirprwyo ei swyddogaethau i is-bwyllgor. Yn ddarostyngedig i'r Rheoliadau hyn, caiff y pwyllgorau perthnasol reoleiddio eu gweithdrefn eu hunain.

Mae rheoliad 4 yn ei gwneud yn ofynnol i bwyllgorau perthnasol gynnal gwrandawiaidau cyn gynted ag y bo'n rhesymol ymarferol ar ôl y dyddiad cau ar gyfer cyflwyno sylwadau. Caniateir cynnal y gwrandawiaidau hyn drwy ddulliau o bell.

Mae rheoliad 5 yn ei gwneud yn ofynnol i bwyllgorau perthnasol roi hysbysiad o unrhyw wrandawiad i bersonau perthnasol a restrir yn yr Atodlen i'r Rheoliadau hyn, ac i'r hysbysiad gynnwys gwybodaeth benodedig.

Mae rheoliad 6 yn nodi gwybodaeth bellach a dogfennau pellach y mae rhaid iddynt fynd gyda'r hysbysiad. Mae rheoliad 7 yn nodi'r camau gweithredu y mae'n ofynnol i barti eu cymryd ar ôl cael hysbysiad o wrandawiad.

Mae rheoliad 8 yn caniatáu i bwyllgor perthnasol oedi gwrandawiaidau naill ai pan fo angen iddo ystyried gwybodaeth neu ddogfennau, neu os na all parti, tyst neu berson sy'n cynrychioli parti, fod yn bresennol.

Mae rheoliad 9 yn caniatáu i barti dynnu sylwadau yn ôl pe bai'n dymuno gwneud hynny.

Mae rheoliad 10 yn ei gwneud yn ofynnol i wrandawiaidau gael eu cynnal yn gyhoeddus ond yn caniatáu i bwyllgorau perthnasol eu cynnal yn breifat os ydynt yn ystyried ei bod yn angenrheidiol.

Mae rheoliad 11 yn nodi'r weithdrefn y mae'n ofynnol i bwyllgor perthnasol ei dilyn wrth gynnal y gwrandawriad, a'r amgylchiadau y caiff ganiatáu i bartïon fod yn bresennol, cwestiynu a chroesholi personau yn y gwrandawriad odanynt.

Mae rheoliad 11(7) yn caniatáu i bwyllgorau perthnasol eithrio personau sy'n aflonyddu ar y gwrandawriad neu osod amodau ar eu presenoldeb; os yw person yn cael ei eithrio, rhaid i'r pwyllgor perthnasol ganiatáu iddo gyflwyno sylwadau ysgrifenedig y mae rhwymedigaeth ar y pwyllgor perthnasol i'w hystyried.

Mae rheoliad 12 yn gwneud darpariaeth mewn achosion pan na fo parti yn bresennol yn y gwrandawriad, ac yn caniatáu i bwyllgorau perthnasol ohirio'r gwrandawriad neu fwrw ymlaen yn absenoldeb parti.

Mae rheoliad 13 yn nodi'r weithdrefn pan na fo gwrandawriad i'w gynnal, er enghraifft pan fydd y partiion wedi hysbysu'r pwyllgor perthnasol eu bod yn cydsynio i'r mater gael ei benderfynu heb wrandawriad.

O dan reoliad 14 mae'n ofynnol i bwyllgorau perthnasol wneud eu penderfyniad a dyroddi hysbysiad o benderfyniad o fewn pum niwrnod gwaith ar ôl diwrnod olaf y gwrandawriad.

Mae rheoliad 15 yn ei gwneud yn ofynnol i bwyllgorau perthnasol sicrhau bod cofnod yn cael ei wneud o'r gwrandawriad a'i fod yn cael ei gadw am chwe mlynedd ar ôl y gwrandawriad.

Mae rheoliadau 16 a 17 yn caniatáu i bwyllgorau perthnasol ddiystyru neu unioni canlyniadau unrhyw achosion o afreoleidd-dra sy'n deillio o fethu â chydymffurfio â gofyniad gweithdrefnol, ac i gywiro llithriadau neu hepgoriadau damweiniol mewn unrhyw gofnod o'u penderfyniad.

Ystyriwyd Cod Ymarfer Gweinidogion Cymru ar gynnal Asesiadau Effaith Rheoleiddiol mewn perthynas â'r Rheoliadau hyn. O ganlyniad, lluniwyd asesiad effaith rheoleiddiol o'r costau a'r manteision sy'n debygol o ddeillio o gydymffurfio â'r Rheoliadau hyn. Gellir cael copi oddi wrth: Llywodraeth Cymru, Parc Cathays, Caerdydd, CF10 3NQ ac fe'i cyhoeddir ar www.llyw.cymru.

202X Rhif (Cy.)

IECHYD Y CYHOEDD, CYMRU

Rheoliadau Pwyllgorau Trwyddedu Triniaethau Arbennig (Cymru) 202X

<i>Gwnaed</i>	***
<i>Gosodwyd gerbron Senedd Cymru</i>	***
<i>Yn dod i rym</i>	***

Mae Gweinidogion Cymru, drwy arfer y pwerau a roddir gan baragraff 21(4) o Atodlen 3 i Ddeddf Iechyd y Cyhoedd (Cymru) 2017(1), yn gwneud y Rheoliadau a ganlyn.

Enwi a chychwyn

1.—(1) Enw'r Rheoliadau hyn yw Rheoliadau Pwyllgorau Trwyddedu Triniaethau Arbennig (Cymru) 202X.

(2) Daw'r Rheoliadau hyn i rym ar XXX.

Dehongli

2.—(1) Yn y Rheoliadau hyn—

ystyr “awdurdod lleol” (*“local authority”*) yw awdurdod lleol fel y'i diffinnir yn adran 124 o'r Ddeddf;

ystyr “cais” (*“application”*) yw cais a wneir yn unol ag Atodlen 3 i'r Ddeddf ar gyfer dyroddi, adnewyddu neu amrywio trwydded triniaeth arbennig;

ystyr “ceisydd” (*“applicant”*) yw person sy'n gwneud cais;

ystyr “deiliad trwydded” (*“licence holder”*) yw person sy'n dal trwydded triniaeth arbennig;

(1) 2017 dccc 2. *Gweler* adran 124(1) o'r Ddeddf honno am y diffiniad o “rheoliadau”.

mae “dirymu” (“*revocation*”) i’w ddehongli yn unol ag adran 68 neu adran 73 o’r Ddeddf (fel y bo’n gymwys);

ystyr “y Ddeddf” (“*the Act*”) yw Deddf Iechyd y Cyhoedd (Cymru) 2017;

ystyr “gwrandawriad” (“*hearing*”) yw’r gwrandawriad y cyfeirir ato yng ngholofn 1 o’r tabl yn yr Atodlen i’r Rheoliadau hyn yn ôl y digwydd;

mae “hysbysiad o benderfyniad” (“*notice of decision*”) i’w roi yn unol â pharagraff 16 neu 17 o Atodlen 3 i’r Ddeddf (fel y bo’n gymwys);

ystyr “hysbysiad o wrandawriad” (“*notice of hearing*”) yw hysbysiad a roddir i barti yn unol â rheoliad 5;

ystyr “hysbysiad rhybuddio” (“*warning notice*”) yw hysbysiad a ddyroddir yn unol â pharagraff 15(3) o Atodlen 3 i’r Ddeddf;

ystyr “parti” (“*party*”) yw person y rhoddir hysbysiad o wrandawriad iddo yn unol â rheoliad 5(1);

ystyr “pwyllgor perthnasol” (“*relevant committee*”) yw pwyllgor trwyddedu y dirprwyir swyddogaethau iddo yn rhinwedd paragraff 21(1) o Atodlen 3 i’r Ddeddf neu is-bwyllgor trwyddedu y rhoddir y pŵer iddo i gyflawni swyddogaethau o’r fath drwy drefniant o dan baragraff 21(2)(b) o Atodlen 3 i’r Ddeddf;

ystyr “sylwadau” (“*representations*”) yw sylwadau a gyflwynir yn unol â pharagraff 15 o Atodlen 3 i’r Ddeddf mewn perthynas â hysbysiad rhybuddio a ddyroddir gan awdurdod lleol;

ystyr “trwydded triniaeth arbennig” (“*special procedure licence*”) yw trwydded a ddyroddir gan awdurdod lleol yn unol ag adran 59(1) o’r Ddeddf;

mae i “tystysgrif gymeradwyo” (“*approval certificate*”) yr ystyr a roddir yn adran 70 o’r Ddeddf;

ystyr “unigolyn dynodedig” (“*designated individual*”) yw person y mae hysbysiad wedi ei roi iddo gan awdurdod lleol o dan adran 61 o’r Ddeddf.

(2) Yn y Rheoliadau hyn, mae cyfeiriad at adran, neu baragraff o Atodlen, yn gyfeiriad at yr adran o’r Ddeddf, neu at y paragraff o’r Atodlen i’r Ddeddf.

(3) Yn y Rheoliadau hyn, mae cyfeiriad at wrandawriad pwyllgor perthnasol a gynhelir drwy ddulliau o bell yn gyfeiriad at wrandawriad a gynhelir drwy gyfrwng unrhyw gyfarpar neu gyfleuster arall sy’n galluogi personau nad ydynt yn yr un lle i siarad â’i gilydd ac i gael eu clywed gan ei gilydd (pa un a yw’r cyfarpar neu’r cyfleuster yn galluogi’r personau hynny i weld ei gilydd neu gael eu gweld gan ei gilydd ai peidio).

(4) Ac eithrio fel y darperir fel arall, mae gofyniad o dan y Rheoliadau hyn i roi hysbysiad (neu i hysbysu) yn ofyniad i roi hysbysiad ysgrifenedig.

(5) Mae dogfen y mae'n ofynnol iddi fod yn "ysgrifenedig", neu hysbysiad y mae'n ofynnol iddo fod yn "ysgrifenedig", yn rhinwedd y Rheoliadau hyn yn cynnwys cyfathrebiad electronig, fel y diffinnir "electronic communication" yn adran 15(1) o Ddeddf Cyfathrebiadau Electronig 2000(1).

Cwmpas

3.—(1) Mae'r Rheoliadau hyn yn gymwys i weithdrefnau pwyllgor perthnasol mewn perthynas ag arfer ei swyddogaethau o dan baragraff 21 o Atodlen 3 i'r Ddeddf.

(2) Yn ddarostyngedig i ddarpariaethau'r Rheoliadau hyn, mater i'r pwyllgor perthnasol yw penderfynu ar y weithdrefn sydd i'w dilyn mewn perthynas â'r swyddogaethau a bennir ym mharagraff (1).

Y cyfnod o amser y mae gwrandawriad i'w gynnal ynddo

4.—(1) Pan fo gwrandawriad yn ofynnol mewn perthynas â gweithdrefn a restrir yng ngholofn 1 o'r tabl yn yr Atodlen i'r Rheoliadau hyn, rhaid i'r pwyllgor perthnasol drefnu i'r gwrandawriad ddechrau cyn gynted ag y bo'n rhesymol ymarferol ar ôl i unrhyw gyfnod ar gyfer sylwadau a nodir yn yr hysbysiad rhybuddio ddod i ben.

(2) Mewn unrhyw achos pan fo'r gwrandawriad i'w gynnal ar fwy nag un diwrnod, rhaid i'r pwyllgor perthnasol drefnu i'r gwrandawriad ddigwydd ar ddiwrnodau gwaith olynol.

Hysbysiad o wrandawriad

5.—(1) Rhaid i bwyllgor perthnasol roi hysbysiad o unrhyw wrandawriad y mae'n ofynnol ei gynnal mewn perthynas â gweithdrefn a restrir yng ngholofn 1 o'r tabl yn yr Atodlen i'r Rheoliadau hyn, i bob un o'r personau a restrir yng ngholofn 2 o'r tabl hwnnw.

(2) Rhaid i bwyllgor perthnasol sicrhau bod yr hysbysiad y cyfeirir ato ym mharagraff (1)—

- (a) pan fo'r gwrandawriad yn cael ei gynnal drwy ddulliau o bell yn unig, yn rhoi manylion ynghylch dyddiad ac amser y gwrandawriad a sut i gael mynediad iddo,
- (b) pan fo'r gwrandawriad yn cael ei gynnal yn rhannol drwy ddulliau o bell neu pan na fo'n cael ei gynnal drwy ddulliau o bell, yn rhoi

(1) 2000 p. 7; diwygiwyd adran 15(1) gan Ddeddf Cyfathrebiadau 2003 (p. 21).

manylion ynghylch dyddiad, amser a lleoliad y gwrandawriad a sut i gael mynediad iddo,

- (c) yn datgan y bydd y pwyllgor perthnasol yn rhoi ar gael y dogfennau a restrir yn y cofnod perthnasol yng ngholofn 3 o'r tabl yn yr Atodlen i'r Rheoliadau hyn, os yw'r personau hynny yn gofyn amdanynt (oni bai bod y pwyllgor perthnasol yn ystyried bod y sylwadau yn flinderus, yn wacsaw neu fod sicrwydd na fydd y sylwadau'n dylanwadu ar benderfyniad y cais, y dynodiad arfaethedig neu'r dirymiad arfaethedig), a
- (d) yn cael ei anfon fel ei fod yn dod i law, yng nghwrs arferol digwyddiadau, heb fod yn hwyrach na 10 niwrnod gwaith cyn y diwrnod cyntaf y mae'r gwrandawriad i'w gynnal arno (fel y'i pennir yn yr hysbysiad).

Gwybodaeth sydd i fynd gyda hysbysiad o wrandawriad

6.—(1) Rhaid i wybodaeth ysgrifenedig sy'n esbonio'r hyn a ganlyn fynd gyda'r hysbysiad o wrandawriad—

- (a) y canlyniadau y darperir ar eu cyfer o dan reoliad 11(1) pan fo parti yn rhoi gwybod i'r pwyllgor perthnasol nad yw'n dymuno bod yn bresennol na chael ei gynrychioli yn y gwrandawriad, neu'n methu â rhoi gwybod i'r pwyllgor perthnasol pa un a yw'r parti yn dymuno bod yn bresennol neu gael ei gynrychioli yn y gwrandawriad;
- (b) y terfyn amser erbyn pryd y dylai parti roi gwybod i'r pwyllgor perthnasol bod y parti yn dymuno bod yn bresennol yn y gwrandawriad neu ei annerch, a'r dull y dylai'r parti ei ddilyn i wneud hynny;
- (c) y terfyn amser erbyn pryd y dylai parti roi gwybod i'r pwyllgor perthnasol bod y parti yn dymuno cael ei gynorthwyo neu ei gynrychioli gan berson arall, a'r dull y dylai'r parti ei ddilyn i wneud hynny;
- (d) y terfyn amser erbyn pryd y dylai parti roi gwybod i'r pwyllgor perthnasol bod y parti yn dymuno galw tyst i roi tystiolaeth yn y gwrandawriad a rhoi gwybod iddo am y materion y mae'r parti yn dymuno i'r tyst roi tystiolaeth mewn perthynas â hwy, a'r dull y dylai'r parti ei ddilyn i wneud hynny;
- (e) y terfyn amser erbyn pryd y dylai parti roi gwybod i'r pwyllgor perthnasol bod y parti yn dymuno tynnu unrhyw sylwadau yn ôl, a'r dull y dylai'r parti ei ddilyn i wneud hynny;
- (f) y canlyniadau pan fo parti wedi dweud ei fod yn dymuno bod yn bresennol neu gael ei

gynrychioli yn y gwrandawiad, ond yn methu â bod yn bresennol neu'n methu â chael ei gynrychioli yn y gwrandawiad;

- (g) y materion y mae'r pwyllgor perthnasol yn ystyried ar y pryd y bydd eisiau cael eglurhad yn eu cylch gan barti yn y gwrandawiad;
- (h) y terfyn amser, os oes un, erbyn pryd y dylai parti roi gwybod i'r pwyllgor perthnasol ei fod yn fodlon cydsynio i'r cais, y dirymiad arfaethedig neu'r dynodiad arfaethedig gael ei benderfynu heb wrandawiad, a'r dull y dylai'r parti ei ddilyn i wneud hynny, os oes un;
- (i) y weithdrefn sydd i'w dilyn yn y gwrandawiad.

(2) Mewn perthynas â gwrandawiadau o dan y darpariaethau a restrir yng ngholofn 1 o'r tabl yn yr Atodlen i'r Rheoliadau hyn, rhaid i'r dogfennau a restrir yng ngholofn 3 o'r tabl fynd gyda'r hysbysiad o wrandawiad a roddir i'r personau a restrir yng ngholofn 2 o'r tabl.

Y camau gweithredu sydd i'w cymryd ar ôl cael hysbysiad o wrandawiad

7.—(1) Rhaid i barti roi hysbysiad i'r pwyllgor perthnasol, heb fod yn hwyrach na phum niwrnod gwaith cyn y diwrnod y mae'r gwrandawiad i'w gynnal neu cyn diwrnod cyntaf y gwrandawiad, sy'n datgan—

- (a) pa un a yw'n bwriadu bod yn bresennol neu gael ei gynrychioli yn y gwrandawiad;
- (b) pa un a yw'n ystyried bod gwrandawiad yn ddiangen.

(2) Mewn achos pan fo parti yn dymuno i unrhyw berson arall (ac eithrio'r person y mae'n bwriadu iddo ei gynrychioli yn y gwrandawiad) ymddangos yn y gwrandawiad, rhaid i'r hysbysiad y cyfeirir ato ym mharagraff (1) ofyn am ganiatâd i'r person arall hwnnw ymddangos yn y gwrandawiad ynghyd â manylion ynghylch enw'r person hwnnw a disgrifiad byr o'r pwynt neu'r pwyntiau y gallai'r person hwnnw gynorthwyo'r pwyllgor perthnasol yn eu cylch mewn perthynas â chais, sylwadau neu hysbysiad y parti sy'n gofyn am ganiatâd.

Y pŵer i oedi

8.—(1) Caiff pwyllgor perthnasol ar unrhyw adeg—

- (a) oedi gwrandawiad tan ddyddiad penodedig, neu
- (b) trefnu bod gwrandawiad yn cael ei gynnal ar ddyddiad a bennir gan y pwyllgor.

(2) Caiff pwyllgor perthnasol gymryd y camau gweithredu a bennir ym mharagraff (1), os yw'n ystyried ei bod yn angenrheidiol—

- (a) i'w alluogi i ystyried unrhyw wybodaeth neu ddogfennau a ddarperir gan unrhyw barti mewn ymateb i hysbysiad o dan reoliad 6, neu yn y gwrandawriad, neu
- (b) gan roi sylw i allu unrhyw barti, person sy'n cynrychioli parti neu dyst i fod yn bresennol yn y gwrandawriad.

(3) Pan fo pwyllgor perthnasol wedi gohirio gwrandawriad tan ddyddiad penodedig, rhaid iddo, cyn gynted ag y bo'n rhesymol ymarferol, hysbysu'r partion—

- (a) yn achos gwrandawriad sy'n cael ei gynnal drwy ddulliau o bell yn unig, am y dyddiad a'r amser newydd ar gyfer y gwrandawriad a sut i gael mynediad iddo, neu
- (b) yn achos gwrandawriad sy'n cael ei gynnal yn rhannol drwy ddulliau o bell neu nad yw'n cael ei gynnal drwy ddulliau o bell, am y dyddiad, yr amser a'r lleoliad newydd ar gyfer y gwrandawriad a sut i gael mynediad iddo.

(4) Pan fo pwyllgor perthnasol wedi trefnu i'r gwrandawriad gael ei gynnal ar ddyddiad ychwanegol penodedig, rhaid iddo, cyn gynted ag y bo'n rhesymol ymarferol, hysbysu'r partion—

- (a) yn achos gwrandawriad sy'n cael ei gynnal drwy ddulliau o bell yn unig, am y dyddiad ychwanegol a'r amser ar gyfer y gwrandawriad a sut i gael mynediad iddo, neu
- (b) yn achos gwrandawriad sy'n cael ei gynnal yn rhannol drwy ddulliau o bell neu nad yw'n cael ei gynnal drwy ddulliau o bell, am y dyddiad ychwanegol, yr amser a'r lleoliad ar gyfer y gwrandawriad a sut i gael mynediad iddo.

Tynnu sylwadau yn ôl

9. Caiff parti sy'n dymuno tynnu unrhyw sylwadau y mae wedi eu cyflwyno yn ôl wneud hynny—

- (a) drwy roi hysbysiad i'r pwyllgor perthnasol heb fod yn hwyrach na 24 awr cyn y diwrnod y mae'r gwrandawriad i'w gynnal neu cyn diwrnod cyntaf y gwrandawriad, neu
- (b) ar lafar yn y gwrandawriad.

Gwrandawriad i'w gynnal yn gyhoeddus

10.—(1) Yn ddarostyngedig i baragraff (2), rhaid i'r gwrandawriad gael ei gynnal yn gyhoeddus.

(2) Caiff y pwyllgor perthnasol eithrio'r cyhoedd o'r gwrandawriad cyfan neu o ran ohono os yw wedi ei fodloni ei bod yn angenrheidiol gwneud hynny o dan holl amgylchiadau'r achos, gan roi sylw—

- (a) i unrhyw annhegwch i barti sy'n debygol o ddeillio o wrandawriad cyhoeddus, a

- (b) i'r angen i ddiogelu, cyn belled ag y bo'n bosibl, fuddiannau masnachol neu fuddiannau dilys eraill sydd gan barti.

(3) At ddibenion paragraff (2), caniateir trin parti ac unrhyw berson sy'n cynorthwyo neu'n cynrychioli parti fel aelod o'r cyhoedd.

Y weithdrefn mewn gwrandawriad

11.—(1) Yn ddarostyngedig i reoliad 10 a pharagraff (7), rhaid i bwyllgor perthnasol ganiatáu i barti fod yn bresennol mewn gwrandawriad ac i gael ei gynorthwyo neu ei gynrychioli gan unrhyw berson pa un a oes gan y person hwnnw gymhwyster cyfreithiol ai peidio.

(2) Ar ddechrau'r gwrandawriad, rhaid i'r pwyllgor perthnasol—

- (a) esbonio i'r partiön pa weithdrefn y mae'n cynnig ei dilyn yn y gwrandawriad, a
- (b) ystyried unrhyw achos pan fo parti'n gofyn o dan reoliad 7(2) am ganiatâd i berson arall ymddangos yn y gwrandawriad, ac ni chaniateir atal caniatâd o'r fath yn afresymol.

(3) Wrth gynnal gwrandawriad, rhaid i'r pwyllgor perthnasol sicrhau y rhoddir cyfle i bob parti i—

- (a) annerch y pwyllgor perthnasol ar unrhyw fater sy'n berthnasol i'r hysbysiad rhybuddio neu i unrhyw sylwadau a gyflwynwyd ynghylch yr hysbysiad rhybuddio;
- (b) galw tystion i roi tystiolaeth ar unrhyw fater sy'n berthnasol i'r hysbysiad rhybuddio neu i unrhyw sylwadau a gyflwynwyd ynghylch yr hysbysiad rhybuddio;
- (c) darparu gwybodaeth bellach am unrhyw fater y mae'r pwyllgor perthnasol wedi dweud y bydd eisiau cael eglurhad pellach yn ei gylch o dan reoliad 6(1)(g), neu esboniad ynghylch unrhyw fater o'r fath.

(4) Wrth gynnal gwrandawriad, rhaid i'r pwyllgor perthnasol hefyd—

- (a) caniatáu i unrhyw barti gwestiynu unrhyw barti arall neu berson sy'n cynrychioli parti ynghylch unrhyw fater sy'n berthnasol i'r hysbysiad rhybuddio, neu i unrhyw sylwadau a gyflwynwyd ynghylch yr hysbysiad rhybuddio, pan fo'r pwyllgor perthnasol yn ystyried ei bod yn briodol gwneud hynny o dan yr holl amgylchiadau, a
- (b) ystyried gwybodaeth ddogfennol neu wybodaeth arall sy'n ategu'r hysbysiad rhybuddio neu sylwadau a gyflwynir gan barti—
 - (i) cyn y gwrandawriad, neu
 - (ii) yn y gwrandawriad,

gyda chydysyniad yr holl bartïon eraill sy'n bresennol yn y gwrandawriad.

(5) Heb ragfarnu paragraffau (3) a (4), rhaid i wrandawriad gael ei gynnal ar ffurf trafodaeth o dan arweiniad y pwyllgor perthnasol, ac ni chaiff y pwyllgor ganiatáu unrhyw groesholi oni bai ei fod yn ystyried bod croesholi yn ofynnol er mwyn iddo ystyried yn briodol yr hysbysiad rhybuddio neu sylwadau a gyflwynir gan unrhyw barti.

(6) Rhaid i'r pwyllgor perthnasol ganiatáu uchafswm cyfnod cyfartal i'r partïon arfer yr hawliau sydd ganddynt ac y darperir ar eu cyfer ym mharagraffau (3) a (4)(a).

(7) Caiff y pwyllgor perthnasol ei gwneud yn ofynnol i unrhyw berson sy'n bresennol yn y gwrandawriad ac sydd, ym marn y pwyllgor, yn ymddwyn mewn modd aflonyddgar, ymadael â'r gwrandawriad a chaiff—

- (a) gwrthod caniatáu i'r person hwnnw ddychwelyd, neu
- (b) caniatáu iddo ddychwelyd dim ond o dan unrhyw amodau a bennir gan y pwyllgor.

(8) Caiff y pwyllgor perthnasol ganiatáu i berson sy'n bresennol yn y gwrandawriad ac sydd, ym marn y pwyllgor, yn ymddwyn mewn modd aflonyddgar, neu sy'n torri amodau a bennir o dan baragraff (7), aros yn y gwrandawriad dim ond o dan unrhyw amodau a bennir gan y pwyllgor.

(9) Pan fo'n ofynnol i berson ymadael â'r gwrandawriad yn unol â pharagraff (7), rhaid i'r pwyllgor perthnasol—

- (a) caniatáu iddo gyflwyno yn ysgrifenedig i'r pwyllgor perthnasol, cyn diwedd y gwrandawriad, unrhyw wybodaeth y byddai wedi bod ganddo'r hawlogaeth i'w rhoi ar lafar pe na fyddai wedi bod yn ofynnol iddo ymadael, a
- (b) ystyried yr wybodaeth honno wrth ddod i'w benderfyniad.

Methiant partïon i fod yn bresennol yn y gwrandawriad

12.—(1) Caiff pwyllgor perthnasol fwrw ymlaen â gwrandawriad yn absenoldeb parti neu gynrychiolydd parti os yw'r parti—

- (a) wedi rhoi gwybod i'r pwyllgor nad yw'n bwriadu bod yn bresennol neu nad yw'n bwriadu cael ei gynrychioli yn y gwrandawriad (ac nad yw wedi rhoi gwybod i'r pwyllgor fel arall wedi hynny),
- (b) wedi methu â rhoi gwybod i'r pwyllgor pa un a yw'n bwriadu bod yn bresennol neu'n bwriadu cael ei gynrychioli yn y gwrandawriad, neu

- (c) wedi ymadael â'r gwrandawriad o dan amgylchiadau sy'n galluogi'r pwyllgor i ddod yn rhesymol i'r casgliad nad yw'r parti yn bwriadu parhau i gymryd rhan.

(2) Os yw parti wedi dweud ei fod yn bwriadu bod yn bresennol neu'n bwriadu cael ei gynrychioli yn y gwrandawriad, ond yn methu â bod yn bresennol neu'n methu â chael ei gynrychioli ynddo, caiff y pwyllgor perthnasol—

- (a) gohirio'r gwrandawriad tan ddyddiad penodedig os yw'n ystyried ei bod er budd y cyhoedd, neu
- (b) bwrw ymlaen â'r gwrandawriad yn absenoldeb y parti.

(3) Pan fo'r gwrandawriad yn mynd rhagddo yn absenoldeb parti, rhaid i'r pwyllgor perthnasol ystyried yn y gwrandawriad yr hysbysiad rhybuddio neu'r sylwadau a gyflwynwyd gan y parti hwnnw.

(4) Pan fo'r pwyllgor perthnasol, o dan y rheoliad hwn, yn gohirio'r gwrandawriad tan ddyddiad penodedig rhaid iddo, cyn gynted ag y bo'n rhesymol ymarferol, hysbysu'r partïon—

- (a) yn achos gwrandawriad sy'n cael ei gynnal drwy ddulliau o bell yn unig, am y dyddiad a'r amser y mae'r gwrandawriad wedi cael ei ohirio iddynt a sut i gael mynediad iddo, neu
- (b) yn achos gwrandawriad sy'n cael ei gynnal yn rhannol drwy ddulliau o bell neu nad yw'n cael ei gynnal drwy ddulliau o bell, am y dyddiad, yr amser a'r lleoliad y mae'r gwrandawriad wedi cael ei ohirio iddynt a sut i gael mynediad iddo.

Y weithdrefn pan na fo gwrandawriad i'w gynnal

13. Pan fo'r partïon wedi hysbysu'r pwyllgor perthnasol eu bod yn cydsynio i'r mater gael ei benderfynu heb wrandawriad, rhaid i'r pwyllgor perthnasol, cyn gynted ag y bo'n rhesymol ymarferol—

- (a) hysbysu'r holl bartïon bod y gwrandawriad wedi ei hepgor, a
- (b) gwneud penderfyniad a dyroddi hysbysiad o benderfyniad.

Hysbysiad o benderfyniad

14. Rhaid i'r pwyllgor perthnasol wneud ei benderfyniad a dyroddi ei hysbysiad o benderfyniad cyn diwedd y cyfnod o bum niwrnod gwaith sy'n dechrau drannoeth diwrnod olaf y gwrandawriad.

Cofnod o wrandawriad

15.—(1) Rhaid i'r pwyllgor perthnasol sicrhau bod cofnod o'r gwrandawriad yn cael ei wneud ar ffurf barhaol a dealladwy.

(2) Rhaid i'r pwyllgor perthnasol sicrhau bod unrhyw gofnod o'r fath yn cael ei gadw am gyfnod o chwe mlynedd o ddyddiad penderfyniad y pwyllgor perthnasol neu, pan fo apêl yn cael ei dwyn yn erbyn penderfyniad y pwyllgor perthnasol, ddyddiad penderfynu'r apêl.

Afreoleidd-dra

16.—(1) Yn ddarostyngedig i baragraff (2), caiff pwyllgor perthnasol ddiystyru unrhyw afreoleidd-dra sy'n deillio o fethu â chydymffurfio â darpariaeth yn y Rheoliadau hyn, neu â gweithdrefn y mae'r pwyllgor perthnasol yn penderfynu arni fel arall yn unol â rheoliad 3(2), pan fo'r afreoleidd-dra hwnnw yn dod i'w sylw cyn iddo ddyroddi hysbysiad o benderfyniad.

(2) Os yw'r pwyllgor perthnasol yn ystyried y gall unrhyw berson fod wedi cael ei ragfarnu gan unrhyw afreoleidd-dra o'r fath, rhaid iddo gymryd y camau hynny y mae'n ystyried eu bod yn angenrheidiol i unioni canlyniadau'r afreoleidd-dra, cyn iddo ddod i'w benderfyniad.

Camgymeriadau clercol

17. Caiff pwyllgor perthnasol gywiro camgymeriadau clercol mewn unrhyw ddogfen sy'n cofnodi penderfyniad gan y pwyllgor, neu wallau sy'n codi mewn dogfen o'r fath o ganlyniad i lithriad neu hegoriad damweiniol.

Enw

Dyddiad

YR ATODLEN Rheoliadau 4 a 5

Colofn 1	Colofn 2	Colofn 3
Y weithdrefn y mae'n ofynnol i wrandawriad gael ei gynnal mewn perthynas â hi	Y person y mae rhaid rhoi hysbysiad o wrandawriad iddo	Y dogfennau y mae copïau ohonynt i fynd gyda'r hysbysiad o wrandawriad
Hysbysiad o fwriad i ddynodi unigolyn yn berson y mae'n ofynnol iddo gael trwydded triniaeth arbennig yn unol ag adran 61(1)	(1) Yr unigolyn dynodedig (2) Unrhyw berson sydd wedi cyflwyno (a heb dynnu'n ôl) sylwadau ynghylch y dynodiad arfaethedig	(1) Yr hysbysiad rhybuddio sydd wedi ei roi o dan baragraff 15(3) o Atodlen 3 i'r Ddeddf (2) Sylwadau a gyflwynwyd mewn perthynas â'r dynodiad arfaethedig
Hysbysiad o wrthod caniatáu cais am drwydded triniaeth arbennig oherwydd nad yw'r holl feini prawf trwyddedu cymwys wedi eu bodloni yn unol ag adran 65(2)	(1) Y ceisydd (2) Unrhyw berson sydd wedi cyflwyno (a heb dynnu'n ôl) sylwadau ynghylch y cais	(1) Yr hysbysiad rhybuddio sydd wedi ei roi o dan baragraff 15(3) o Atodlen 3 i'r Ddeddf (2) Sylwadau a gyflwynwyd mewn perthynas â'r cais
Hysbysiad o wrthod caniatáu cais am drwydded triniaeth arbennig oherwydd euogfarn am drosedd berthnasol yn unol ag adran 66(3)	(1) Y ceisydd (2) Unrhyw berson sydd wedi cyflwyno (a heb dynnu'n ôl) sylwadau ynghylch y cais	(1) Yr hysbysiad rhybuddio sydd wedi ei roi o dan baragraff 15(3) o Atodlen 3 i'r Ddeddf (2) Sylwadau a gyflwynwyd mewn perthynas â'r cais
Hysbysiad o wrthod caniatáu cais i adnewyddu trwydded triniaeth arbennig oherwydd nad yw'r holl feini prawf trwyddedu cymwys wedi eu bodloni yn unol ag adran 67	(1) Y deiliad trwydded sydd wedi gwneud y cais i adnewyddu (2) Unrhyw berson sydd wedi cyflwyno (a heb dynnu'n ôl) sylwadau ynghylch y cais	(1) Yr hysbysiad rhybuddio sydd wedi ei roi o dan baragraff 15(3) o Atodlen 3 i'r Ddeddf (2) Sylwadau a gyflwynwyd mewn perthynas â'r cais i adnewyddu
Hysbysiad o wrthod caniatáu cais i adnewyddu trwydded triniaeth arbennig oherwydd euogfarn am drosedd berthnasol yn unol ag adran 67	(1) Y deiliad trwydded sydd wedi gwneud y cais i adnewyddu (2) Unrhyw berson sydd wedi cyflwyno (a heb dynnu'n ôl) sylwadau ynghylch y cais	(1) Yr hysbysiad rhybuddio sydd wedi ei roi o dan baragraff 15(3) o Atodlen 3 i'r Ddeddf (2) Sylwadau a gyflwynwyd mewn perthynas â'r cais i adnewyddu
Hysbysiad o fwriad i ddirymu trwydded triniaeth arbennig yn unol ag adran 68	(1) Y deiliad trwydded (2) Unrhyw berson sydd wedi cyflwyno (a heb dynnu'n ôl) sylwadau ynghylch y bwriad i ddirymu	(1) Yr hysbysiad rhybuddio sydd wedi ei roi o dan baragraff 15(3) o Atodlen 3 i'r Ddeddf (2) Sylwadau a gyflwynwyd mewn perthynas â'r bwriad i ddirymu
Hysbysiad o fwriad i ddirymu tystysgrif gymeradwyo yn unol ag adran 73	(1) Deiliad tystysgrif gymeradwyo (2) Unrhyw berson sydd wedi cyflwyno (a heb dynnu'n ôl) sylwadau ynghylch y bwriad i ddirymu	(1) Yr hysbysiad rhybuddio sydd wedi ei roi o dan baragraff 15(3) o Atodlen 3 i'r Ddeddf (2) Sylwadau a gyflwynwyd mewn perthynas â'r bwriad i ddirymu
Hysbysiad o wrthod caniatáu cais i amrywio trwydded triniaeth arbennig yn unol â pharagraff 13(1)(b) o Atodlen 3	(1) Y deiliad trwydded sydd wedi gwneud y cais i amrywio (2) Unrhyw berson sydd wedi cyflwyno (a heb dynnu'n ôl) sylwadau ynghylch y cais i amrywio	(1) Yr hysbysiad rhybuddio sydd wedi ei roi o dan baragraff 15(3) o Atodlen 3 i'r Ddeddf (2) Sylwadau a gyflwynwyd mewn perthynas â'r cais i amrywio

<p>Hysbysiad o wrthod caniatáu cais i amrywio trwydded triniaeth arbennig oherwydd euogfarn am drosedd berthnasol yn unol â pharagraff 13(1)(b) o Atodlen 3</p>	<p>(1) Y deiliad trwydded sydd wedi gwneud y cais i amrywio (2) Unrhyw berson sydd wedi cyflwyno (a heb dynnu'n ôl) sylwadau ynghylch y cais i amrywio</p>	<p>(1) Yr hysbysiad rhybuddio sydd wedi ei roi o dan baragraff 15(3) o Atodlen 3 i'r Ddeddf (2) Sylwadau a gyflwynwyd mewn perthynas â'r cais i amrywio</p>
---	--	---

DRAFFET